

Die geestelike trek uit die vlees

Hierdie trek is ons laaste trek hier aan die eindtyd. Dit is 'n geestelike trek uit ons vleeslike toestand waarin ons was voordat ons bekeer is. Elke persoon trek ook op sy tyd en so is ons 'n hele volk Sion, waar die meeste in Egipte/vlees is, sommige al in die woestyn, besig met suiwering en hier en daar is een wat al deur die Jordaan (geestelike doop) is en wat in Kanaän aangekom het.

Hierdie toestand word beskryf in **Openbaring 12**, waar die vrou (gesuiwerde Sion) na die wildernis vlug, saam met diegene wat al geboorte gegee het (wedergeboorte), in haar midde. Hulle is diegene wat reeds die volkome wedergeboorte gesmaak het (in Kanaän). Hier is beide groepe saam. Tans is ons nog almal fisies in Egipte, alhoewel die geestelike toestand verskillend is. Tussen Egipte en die wildernis/woestyn, net voor die Rooi See, is daar wel 'n baken wat vir ons dalk lig op die onderwerp kan gee. Die volk het by Migdol laer opgeslaan, voordat hulle die Rooi See (eintlik Rietsee) bereik het. Dit is ook hier waar die bonatuurlike goddelike beskerming, in die vorm van die opening van die Rooi See, plaasgevind het. Sien **Exodus 14:2-4**:

2 Sê aan die kinders van JisraEl dat hulle moet omdraai en laer opslaen voor die aangesig van Pi-Hágirot, tussen Migdol (beteken "TORING" in Hebreeus) en die see. Reg teenoor Baäl-Sefon moet julle laer opslaen by die see.

3 Dan sal Farao van die kinders van JisraEl sê: Hulle is verdwaal in die Aarde, die wildernis het hulle ingesluit.

4 En Ek sal Farao se hart verhard, dat hy hulle agtervolg; en Ek wil My aan Farao en sy hele leërmaag gewigtig maak, en die Egiptenaars sal weet dat Ek JaHWeH is. En hulle het so gedoen.

Hierdie plek, Migdol, wat **toring** beteken hou die sleutel van ons hedendaagse trek uit Egipte, waar 'n konfrontasie met die Draak-groep (Farao en sy leër) sal plaasvind. Eerstens moet Migdol in jou eie hart gevind word. Die volgende gedeelte in **2 Samuel 22: 47-51** gee ons meer lig op hierdie toring/ Migdol in ons harte. Migdol word egter algemeen aanvaar as "skaapstoring" en nie net "toring" nie.

47 JaHWeH leef! En geloofd sy my Rots, en laat verhoog wees die Elohey wat die Rots is van my Lossing!

48 Die El wat my die wraak gee en volke onder my neerwerp;

49 en wat my uitlei onder my vyande uit; ja, U verhef my bo my teëstanders, U bevry my van die man van geweld.

50 Daarom wil ek U loof, o JaHWeH, onder die nasies, en tot eer van U Naam wil ek musiek maak;

51 Hy is die Toring (Migdol in Hebreeus) wat die Verlossing van Sy koning groot maak en wat Medelye het met Sy gesalfde, aan Dawid en aan sy saad tot in ewigheid.

Hier beskryf Samuel dat JaHWeH leef, verwysend na ons Verlosser, JaHWèshua, wat ons sal uitlei onder ons vyande uit. Hy noem Hom die Toring/Migdol en dat Hy medelye het met Sy gesalfde, Dawid en sy saad, wat in die eindtyd die Melgisédek-orde sal wees. dus 'n bewys dat die eintlike, die Ware Migdol, ons Verlosser, JaHWèshua is, Verlosser van die skape, oftewel toring van die skape – die Skaapstoring.

Daar is egter nog 'n toring in die Nuwe Testament, wie se handelinge baie belangrik is in ons studie van Migdol, en dit is die vrou wat deur ons Meester van sewe duiwels verlos is, genaamd Maria Magdalena, ook genoem Mirjam die Migdolieth in die Boek van Herinnering, waar laasgenoemde haar eintlike naam in Hebreeus is. Sy was ook die vrou wat by ons Meester se graf gewaak het en Hom eerste gesien/herken het. Haar naam beteken ook Migdol/toring (vroulik). Hierdie vrou se verhaal, waar sy verlos word van haar besetenheid (haar geestelike uittog uit Egipte) word wel in **Lukas 7 en 8** beskryf, maar is ietwat verwarrend. Die werklike verhaal, soos vertel deur JaHWèshua Self, vind ons in **Die Groot Johannes Evangelie – Boek 6**: Dit is belangrik om te sien hoedat hierdie vrou, as die "klein skaapstoring/Migdol" deur die "Groot Skaapstoring/Migdol" genees word van haar sondige toestand, voorgestel as die trek uit die vleeslike Egipte na die geestelike toe. In die gees vind hierdie genesing dus ook plaas by die geestelike Migdol/skaapstoring, net voor die Rooi See kruising, wat die skeiding tussen siel en vlees voorstel.

Die genesing van die besete jong vrou Maria Magdalena GJE 6. Hoofstuk 185 Maar kort daarna, ongeveer na 'n kwartier, kry die gids (Maria/Migdol) van die Romeine, wat andersins as publieke vrou met ontugtige manne verkeer, vanweë te veel van die genoemde wyn geweldige krampe, en sy kerm en vertrek haar gesig terwyl haar ledemate en spiere vreeslik vol krampe word.

Hierdie stel die sondige toestand van Sion voor, voorgestel deur Maria Magdalena/Migdol, waar ons volk in allerlei vleeslike en geestelike hoerery vasgevang sit. Die Romeine stel ook die Roomse godsdiens voor waarin Maria Migdol vasgevang sit.

[2] **Die Romeine** was daardeur hewig ontsteld, omdat hulle so 'n verskynsel as 'n buitengewone slegte Malum Omen* beskou het. Hulle sê: 'Wee ons, die gode het baie kwaad geword vir ons, omdat ons 'n vreemde God gaan opsoek het! Wat doen ons nou?' *(slegte voortekene)

[3] **Lasarus** sê: 'Bly gewoon rustig! Want ek ken hierdie persoon al geruime tyd; sy het al 'n aantal jare las van hierdie siekte, en sy het dit al meermale gehad, veral as sy ietwat te veel wyn gedrink het. Ons Judeërs noem dit besetenheid deur één of dikwels ook meer bese geeste. In vroeër tye, toe daar nog baie vroom mense onder die Judeërs te vinde was, kon sulke bese geeste deur die

gebed van 'n vroom mens verjaag word; maar in hierdie tyd bestaan dit nouliks meer. Natuurlik sou ons besondere Man dit wel oombliklik kon doen, as Hy dit wou hê!

[6] Die vernaamste Romein kom na ons tafel toe, waar ons baie rustig sit, soek juis vir My uit en sê: 'Beste vriend, is daar dan glad niemand onder u wat die ongelukkige meisie bietjie kan help nie? U sit egter so ongeïnteresseerd daar, terwyl hierdie arme vrou met die dood veg! Ek sou haar beslis graag gehelp het as ek 'n middel teen die kwaal sou ken; maar dit is by ons Romeine nog baie sleg gestel met die genees van die spesiale soort kwale.'

[7] Ek sê: 'U het uself tot My gewend, sonder om te weet wie Ek is; maar u halwe vertrouwe dat daar aan ons tafel iemand is wat die besetene sou kon help, het u na My toe gebring. En Ek sê u dat u gees u al die regte Man aangewys het, wat haar ook sal help tot haar liggaamlike welsyn en tot welsyn van haar siel. Let dan goed op met watter middele Ek hierdie jong vrou vir altyd sal help!'

[8] Toe staan Ek van My stoel af op, gaan na die heeltemal verstyfde jong vrou wat op die grond lê, strek My hande oor haar uit en bedreig die sewe bose geeste in haar.

Hierdie sewe bose geeste stel die absolute teendeel van die sewe ware geeste van ons Vader voor, soos voorheen in hierdie boek vermeld, wat JaHWèshua uit Sion se harte sal uitdryf aan die eindtyd. Dit is die valse liefde, die wêreldse wysheid, die verkeerde orde, onwilligheid, gebrek aan erns/geregtigheid, ongeduld, en onbarmhartigheid.

[9] Maar die geeste skreeu hardop uit haar buik: 'O Jahshua, Seun van Dawid, laat ons nog 'n kort tydjie in dié huis van ons!'

[10] Maar Ek dreig hulle nog 'n keer, en hulle verlaat die jong vrou op dieselfde oomblik.

[11] En die jong vrou staan op en was vrolik, fris en gesond asof sy nooit iets makeer het nie. Maar toe sy My langs haar sien en mense haar vertel dat Ek haar gehelp het, kyk sy My strak aan en sê: 'Ag, dit is tog die geweldige man vir wie my hart al sedert 'n jaar gelede steeds vinniger klop! En juis Hy, wat ek oneindig liefgehad het en nog liefhet sedert ek Hom slegs eenmaal in die verbygaan gesien het, kom my nou te hulp! O vriend, U kon my maar eerder laat sterwe het in plaas daarvan dat ek U nou tot groot verdriet van my hart weer moet sien, sonder om ooit die hoop te hê om ook deur u bemin te word! Want U is 'n suiwer mens en ek is 'n verdorwe hoer!'

[12] Daarop val sy aan My voete neer, omklem dit knielend en maak hulle nat met trane van liefde en berou.

Toe die bose geeste uit is, toe herken Migdol-dogter dadelik haar Meester, en in nederige berou bedank sy Hom vir wat Hy gedoen het, naamlik om haar uit Egipte, die vlees, te verlos.

[13] Toe kom 'n paar leerlinge na vore, wil haar van My voete wegtrek, en sê vir haar dat so-iets hier nie van pas is nie.

[14] Maar Ek sê vir die leerlinge: 'Wat gaan dit julle aan?! Is Ek dan nie Meester oor Myself en nou ook oor haar nie? As dit vir My teveel word, sal Ek wel vir haar sê wat gepas of nie gepas is nie! Ek sê vir julle: Hierdie jong vrou het baie gesondig, - maar sy hou ook meer van My as julle almal saam; daarom sal haar ook baie vergewe word. En verder sê Ek nog vir julle, dat orals waar My evangelie gepredik sal word, ook oor die voorval en hierdie jong vrou gepraat sal word.'

[15] Toe trek die leerlinge hulle terug en sê niks meer nie.

[16] Maar Ek sê daarop vir die jong vrou: 'Staan op, want jy is geholpe, en al jou sonde is jou vergewe! Maar gaan nou heen en sondig nie meer nie, sodat jy nie nog iets erger sal oorkom nie! Want as 'n bose gees 'n mens verlaat het, trek hy deur dorre streke en woestyne en soek na 'n woning, en as hy niks vind nie, kom hy weer terug. Dan vind hy sy ou woning skoongevee en gereinig, sodat hy 'n groot begeerte kry om weer daarin te trek. As hy egter sien dat hy te swak is, gaan haal hy sewe ander geeste, wat nog erger is as hy, en gesamentlik trek hulle dan met geweld in die gereinigde woning in, en hierdie tweede toestand van die mens is dan nog baie erger as die eerste. Let dus goed op dat dieselfde jou nie oorkom nie! Staan daarom op, gaan heen en sondig dus nie meer nie!'

[17] Toe staan die jong vrou op en weet van louter liefde en dank vir My byna nie wat sy moes doen nie. Na 'n oomblik vra sy My of sy tog hierdie nag nog hier in die herberg mag bly, omdat dit al laat in die nag geword het.

[18] En Ek sê vir haar: 'Ek praat nie teen jou liggaam nie, maar teen jou siel en haar talle wêreldse begeertes; met jou liggaam kan jy gaan waar jy wil!'

[19] Dit was voldoende vir die jong vrou en sy gaan weer aan tafel sit, - maar haar oë wend sy vir geen oomblik van My af nie.

Hier sal nog vir ewig gepraat word oor hierdie vrou, Migdol/Sion (Dogter van Sion) aan die eindtyd, wat verlos is van haar sonde in haar siel, deur die Groot Skaapstoring/Migdol. Let op hoe vergelyk die Meester haar verder as die een skaap wat verlore is.